

# «Per in pau pli simpel»

Pcd regionala Viamala

DA GION NUTEGN STGIER / ANR

■ **Giast da la pcd regionala Viamala è stà Gerhard Pfister, il president svizzer dals cristiandemocrats. La sia finamira saja da rinforzar il profil da la pcd. Cun Mario Cavigelli e Marcus Caduff haja la pcd grischuna dus fermes candidats per la regenza.** Grazia als buns contacts da cusseglier naziunal *Martin Candinas* hajan els l'onur da beneventar en Tumblestga *Gerhard Pfister*, il president da la pcd, ha ditg il deputà *Roland Kunfermann*. *Remi Cramer*, il president da la pcd regionala Viamala è sa mussà ventiraivel da la preschientscha da cusseglier naziunal *Gerhard Pfister*, cusseglier guvernativ *Mario Cavigelli* e *Marcus Caduff*, il schef da fracziun da la pcd grischuna e candidat per la regenza.

## I dovra blier engaschament

*Gerhard Pfister*, el ch'è dapi il 2016 president da la pcd svizra, ha ditg che mintga occurrenza organisada d'ina secziun locala ubain regionala saja per la pcd da gronda muntada. Senza la lavur exemplarica da la basa saja strusch pussaivel da fortifitgar il profil da la pcd, quai che saja ina da sias finamiras principalas sco president naziunal da la pcd, ha ditg il cusseglier guvernativ. I dovra da mintgin in grond engaschament per avair success cun la pcd e quel engaschament cumenza savens en in rom pli pitschen. Savens saja uschè che gist las occurrenzas a la basa da la pcd, cun buns temas, hajan ina influenza positiva sin la quota d'electurs, ha menziunà *Gerhard Pfister*.



**Gerhard Pfister vul manar la pcd sin la dretga via e tar success.**

FOTO G. N. STGIER

## Las eleziuns naziunalas 2019

Ina raschun da renunziar a la candidatura per l'uffizi da cusseglier federala *Doris Leuthard* sajan per el cunzunt las eleziuns naziunalas 2019, ha punctuà il president da la pcd svira. Per el sco president da la pcd naziunala, saja in'obligaziun da sustegnair la partida avant, durant e suenter las eleziuns federalas. La realitad saja che la politica principal vegnia farta a Berna e gist per quel intent dovra er la fracziun da la pcd fermes represchentants e represchentantas. Dal reminent haja la pcd grischuna cun cusseglier dals

chantuns *Stefan Engler* e cusseglier naziunal *Martin Candinas* dus personalitads er sin champ naziunal, ha menziunà *Gerhard Pfister*.

## Candidats e candidats cun in bun profil

Avant duas onns cura ch'el haja surpiglià il post da president da la pcd svizra era per el gia cler d'esser er tar las eleziuns federalas 2019 a la testa da la pcd svizra. Savais, ha ditg *Gerhard Pfister*: «Da chattar candidats e candidatas per il cusseglier federal è per in pau pli simpel che da

chattar ina persuna che surpiglia il presi di da la pcd svizra». La retscha da capabels candidats e capablas candidats per il cusseglier federala saja tar la pcd gronda. In da quels candidats saja bain er *Stefan Engler*. *Gerhard Pfister* è dentant da l'avis che *Stefan Engler* resta pli gugent cusseglier dals chantuns, cun esser in premurà cusseglier dals chantuns e cunzunt ina persuna respectada e plain dignitad a Berna. Ultra da quai saja el insumma betg il politicher che less permanentmain esser en las medias, el fetschia pli gugent politica reala.

## Ina dunna ha bunas schanzas

Il president da la pcd svizra ha er numnà intginas persunas che la pcd savess eventualmain preschentar per la successiun da cusseglier federala *Doris Leuthard*. Ina dunna haja segir in grond avantatg da vegnir elegiada, ha menziunà *Gerhard Pfister*. Per exemple savessan quai esser: *Viola Amberd* (VS), *Silvia Steiner* (ZH), *Andrea Gmür* (LU) ed *Elisabeth Schneider-Schneiter* (BL). L'absolvent da la scola claustrala Mustèr ha ditg che'l speria che cusseglier federala *Doris Leuthard* e cusseglier federal *Johann Schneider-Ammann* sortian dal cusseglier federal a medem temp. Ina vacanza dubla saja per il parlament pli interessanta, ella chaschuna per dapli tensiun, la schelta da candidats e candidats saja pli gronda e la derivanza (chantun) da candidats e candidats saja er da gronda muntada.

## Fermas personalitads

Er en il Grischun haja la pcd fermas personalitads e gist tar las eleziuns chantunales vegnian elegidas las persunas e na exnum las partidas. Cun cusseglier guvernativ *Mario Cavigelli* e cun deputà *Marcus Caduff* haja la pcd dus buns trumfs en maun. *Cavigelli* haja fatg buna lavur e meritia ina reelecziun e per *Caduff* sajan las vistas da far il zap en la regenza grischuna fitg bunas. *Gerhard Pfister* è er persvas che la pcd saja sin la dretga via da puspè avair dapli success, i dovra simplamain in pau temp. Ella duess restar ina partida da mez, star en per libertad, solidaritad, per las famiglias e per las valurs dals carstgauns. La pld haja bain er gè intgins onns per sa revegnir, e da preschent haja ella success.